

Mid-Day Dogri News Bulletin, 19th Augsut 2024

समे – 12:25

<><><><><><>

Election 1st Phase

जम्मू कश्मीर च इस ब'रे करोआए जाने आले असैंबली चुनाएं दे पैहले मरहले लेई नोटिफिकेशन कल जारी कीती जाग। पैहले गेड़ तैहत 24एं असैंबली हल्के च मतदान करोआया जाग। 27 अगस्त तगर नामांकन भरे जाई सकदे न। अगले दिन नामांकन पत्रें दी जांच कीती जाग। अपने नामांकन परताने दी खीरी तरीक 30 अगस्त 2024 तैह कीती गेई ते मतदान औंदी 18 सितम्बर गी होग। जियां के पैहले बी दस्सेआ जाई चुके दा ऐ जे हदबंदी मगरा असैंबली हल्के दी तादाद बधाइयै 90 होई गेदी ऐ ते चुनां त्रऊं गेड़ें च करोआए जाने न। 18 सितम्बर गी 24एं असैंबली हल्के च 25 सितम्बर गी 26एं ते पैहली अक्तूबर गी 40एं असैंबली हल्के च वोट पाए जांगन। वोटें दी गिनतरी 4 अक्तूबर गी होग ते उस्सै दिन नतीजे बी सामनै आई जांगन। एह ध्यान देने जोग गल्ल ऐ जे इस बारी असैंबली चुनाएं दी अपनी इक महत्ता ऐ की जे एह 10 ब'रें परैत करोआए जा'रदे न। 2019 ब'रे च जम्मू कश्मीर राज्य गी दऊं संघ शासत प्रदेशें च तक्सीम करी दित्ता गेआ हा। सर्वोच्च अदालतै पिछले ब'रे दफा 370 दे प्रावधानें पर फैसला सुनांदे होई निर्देश दित्ता हा जे 30 सितम्बर 2024 तगर जम्मू कश्मीर च असैंबली चुनां करोआई दित्ते जान।

<><><><><><>

Electoral Polls

जम्मू कश्मीर च औंदे असैंबली चुनाएं लेई वोटर फेहरिस्तें दा मुकदा रूप कल जारी कीता जाग। कुल मतदाता 90 लक्ख दे कोल कच्छ होई सकदे न। इक बारी चुनां हल्के ते मतदाताएं दी गिनतरी च मता महत्व रखदी ऐ। की जे हदबंदी करी केइएं चुनां हल्के दिएं हदें च बदलाव कीता गेदा ऐ ते असैंबली सीटां बी 86 थमां बधाइयै 90 कीतियां गेदियां न। तकरीबन 21 लक्ख वोटर 20एं थमां 29एं ब'रे दी बरेसू तगर दे न।

<><><><><><>

JK-NHW Security

पिछले किश दिनें दरान डोडा, रामबन ते उधमपुर जिले दिएं उच्चिएं थाहरें उप्पर होई दिएं आतंकी वारदातें दी पछोकड़े च बटोत-डोडा-किशतवाड़ राष्ट्रीय जरनैली शिड़क एनएच-244 ते जम्मू श्रीनगर राष्ट्रीय जरनैली शिड़क एनएच-44 उप्पर सुरक्षा दे निग्गर बंदोबस्त कीते गेदे न। साढ़े आकाशवाणी दे जम्मू संवाददाता नै जानकारी दित्ती ऐ जे समाज विरोधी तत्वें उप्पर कड़ी तक्क रखने लेई एआई अधारत चेहरें दी पंछान करने आले सिस्टम, ड्रोनें ते सीसीटीवी कैमरें दी मदाद लैती जा'रदी ऐ। पत्नीटॉप दी उच्चिएं धारें उप्पर होई दी आतंकी वारदातें मगरा उधमपुर, रियासी जिले दे इलावा पत्नीटॉप ते सन्नासर च सुरक्षा दे सख्त बंदोबस्त कीते गेदे न। पुलस ते सुरक्षाबले, बटोत-डोडा-किशतवाड़ ते जम्मू श्रीनगर राष्ट्रीय जरनैली शिड़के दे इलावा होर दुइए राबता शिड़के उप्पर गड्डिएं दी जांच करने लेई चैक प्वाइंट स्थापत कीते न। उधमपुर, चनैनी, सन्नासर, पत्नीटॉप, अससर, बटोत, डोडा, किशतवाड़, रामबन, बनिहाल, रामसू ते होर दुए थाहरें उप्पर सुरक्षाबले ते पुलस अधिकारिएं दी तैनाती कीती गेदी ऐ। सारिएं सुरक्षा अजेसिएं गी हाई अलर्ट उप्पर रखेआ गेदा ऐ ते पुलस ते सेना दे वरिष्ठ अधिकारी हर स्थिति उप्पर तक्क रखा'रदे न।

<><><><><><>

Raksha Bandhan

भ्राह्-भैहण दे बश्कार खास रिशते दा प्रतीक रक्खड़ी दा ध्यार अज्ज जम्मू सनें पूरे देश च मनाया जा'रदा ऐ। इस खास दिन भैहणां अपने भ्राएं गी रक्खड़ी बन्नदियां न ते परमात्मा कोला उंदी खुशहाली-अच्छी सेहत दी कामना करदियां न। भ्राह् बी अपनी भैहणे गी तोहफे दिंदे न ते उंदी रक्षा करने ते हर मौके साथ देने दा वचन दिंदे न। बजारें च ध्यार दी रौनक साफ दिक्खी जाई सकदी ऐ खास करियै रक्खड़िएं ते मठाई दी हट्टिएं पर। इस बारी अपने देश च बनाई गेदिएं रक्खड़िएं दी मंग बधी ऐ। प्रधानमंत्री नरेन्द्र मोदी हुंदा वोकल फॉर लोकल नारे दा असर दिखने गी लब्भा'रदा ऐ की जे महिलां चीनी रक्खड़ियां नेई खरीदा दियां न जेहदे करी मकामी रक्खड़ी बनाने आले खासे खुश न।

<><><><><><>

President

राष्ट्रपति द्रौपदी मुर्मू होरें देशवासिं गी रक्खड़ी दे ध्यार दी मुमारखां दित्तियां न। अपने सनेह च राष्ट्रपति होरें आखेआ जे रक्खड़ी दा ध्यार भैहण-भ्राह् दे प्यार दे डूहगेपन गी दस्सदा ऐ ते भैहण-भ्राह् च आपसी विश्वास ते अनूठा रिश्ता होर मजबूत होंदा ऐ। राष्ट्रपति होरें आखेआ जे एह ध्यार धार्मिक ते सांस्कृतिक हदें शा बधियै पूरे देश च प्यार ते हिर्ख कन्नै मनाया जंदा ऐ ते एह ध्यार महिलाएं दे हितें दी रक्षा दे साढे धेइयै गी होर मजबूत करदा ऐ।

प्रधानमंत्री नरेन्द्र मोदी होर अज्ज रक्खड़ी दे ध्यार उप्पर देशवासिं गी ममारकबाद दित्ती ऐ। अपने सनेह च प्रधानमंत्री होरें गलाया जे एह ध्यार भैहणें ते भ्राएं बश्कार गैहरे प्रेम दा प्रतीक ऐ। उनें गलाया जे एह ध्यार सब्बने दे जीवन च खुशहाली ते सुख-समृद्धि लेइयै आए।

उपराज्यपाल मनोज सिन्हा होरें बी रक्खड़ी दे ध्यार दी सब्बनें लोकें गी ममारकबाद दित्ती ऐ। उनें गलाया जे भ्राएं ते भैहणें दे प्यार ते भरोसे दा प्रतीक एह ध्यार साढी संस्कृति दी रिवायती मूल गी होर मजबूत करदा ऐ।



Amarnath Yatra

सलाना श्री अमरनाथ यात्रा अज्ज रक्खड़ पुन्नेआ आले ध्याड़े सम्पन्न होआरदी ऐ। इस ब'रे देश दे बक्ख-बक्ख हिस्से थमां 5 लक्ख शा मते श्रद्धालुएं बाबा बर्फानी दे हिमलिंगम रूपै दे दर्शन कीते। इस ब'रे प्रशासन नै यात्राएु दी सुविधा लेई हर लोड्चदे इंतजाम कीते दे हे। शिवें दी पवित्र छड़ी मुबारक अज्ज बडलै मूह न्हरे पवित्र गुफा च पुजजी ते उत्थें रिवायती पूजा पाठ दे कन्नै गै 43 दिनें तोड़ी चली दी एह सलाना यात्रा सम्पन्न होई गई। पवित्र छड़ी दे संरक्षक महंत दीपेन्द्र गिरी हुंदी अगुवाई च साधुएं दे जत्थे नै जंदी रातीं पंचतरणी च बसाह कीता ते अज्ज बडलै छड़ी मुबारक गी पवित्र गुफा च आंदा गेआ। 29 जून गी शुरु होई दी इस यात्रा दरान 5 लक्ख कोला मते श्रद्धालुएं पवित्र गुफा च मत्था टेकेआ। यात्रा गी पूरी चाल्ली रमानदारी ते बवस्था आले ढंगै सिर तोड़ चाढ़ने लेई प्रशासन श्री अमरनाथ जी श्राईन बोर्ड ते होरने सुरक्षा अजेंसिएं आस्सेआ सुद्दे बंदोबस्त कीते दे हे।

इस यात्रा दरान श्रद्धालुएं दी सुविधा लेई मुल्खै दे बक्ख-बक्ख हिस्से थमां आइयै यात्रा रस्ते च लंगर लाने आले संगठन दी बी अहम भूमका रौंहदी ऐ।

<><><><><><>

Machail Yatra

सलाना श्री मचेल माता यात्रा दी पवित्र छड़ी कल धार्मिक श्रद्धा बश्कार किश्तवाड़ पुज्जी। साढ़े जिला संवाददाता कैलाश नाथ होरें जानकारी दित्ती ऐ जे किश्तवाड़ दे डिप्टी कमीशनर राजेश कुमार शवण होरें किश्तवाड़ कस्बे च पवित्र छड़ी दा धार्मिक श्रद्धा कन्नै सुआगत कीता। एह्दे मगरा कड़ी सुरक्षा बश्कार पवित्र छड़ी श्री गोली शकरं मंदरै लेई रवाना होई गेई, जेहड़ी अज्ज पाड्डर पुज्जोग।

<><><><><><>